


LE
PATER NOSTER
des Catholiques.



PATER NOSTER

des Catholiques.



1011.



LE PATER NOSTER DES CATHOLIQUES.

Seigneur secourez nous : car hélas ! quel martyre
De voir ainsi traicter comm' on fait vos enfans,
Le Schisme entre la France, & on ne l'ose dire
A qui donc aurons nous recours qu'à vous disant,

PATER NOSTER.

Pere nous estes vous (Seigneur & tres-bon Pere,
Tels qui en ont le nom hélas ! ne le sont pas,
Pour complaire aux Anglois on trouble nostre Mere,
Et quasi l'on voudroit, Seigneur, vous mettre bas.

QUI ES IN COELIS.

Où visent ces desseins ? ou tend ceste entreprise,
D'escrire de parler, de mutiner tousiours ?
N'est-ce pas pour troubler le repos de l'Eglise ?
Ce malheur aduendra, si ce n'est que la Cour.

SANCTIFICETVR.

C'est le remede vnique, & sans lequel la France
Ne doit pour esperer de long temps de bon heur,
Ses Lys se faneront : Donc ô nostre esperance,

A ij

4

Sanctifiez la Cour, grauez luy dans le cœur.

NOMEN TVVM.

*Car cela se faisant l'on verra nos Prouinces,
Prosperer en tous biens, sur tout si dans l'Estat
Vne heureuse amitié, joinct ensemble nos Princes
Et que le S. Hymon, de loing par vn contract.*

ADVENIAT.

*Loüys petit grand Roy, si certaines maximes
De ces Isles du Nort, & païs d'outre Mer,
Venoyent en Vostre Cour, chassez-les, ce sont limes
Qui rongent sourdement, mais qui pourroyent armer.*

REGNUM TVVM.

*Madame qui tenez en ceste Monarchie
La Regence, estimez ce Conseil non commun,
Bien pis, il vous rendra de grands maux affranchie,
Parlez: car vous pouuez tout parfaire avec vn*

FIAT.

*Ce qui me fasche plus est voir les Catholiques
Seconder aujourdhuy par noises & debats
Les pestilens desseins des cerueaux Heretiques,
Et qui n'en pleureroit? ah! Seigneur ce n'est pas*

VOLUNTAS TVA.

Gens de peu de discours transportez de manie

5

Embrasent de ces feux, la ville & le pays,
Infames partisans, peres de calomnie,
Vostre loyer sera d'estre en terre hays

SICUT IN COELO.

Auciel, dis- je, ennemis de toute mesdisance,
Iuste & certain Vengeur de vos peruersitez,
Qui donnera bien tost le lustre à l'innocence
Et vous rendra confus comme vous meritez.

ET IN TERRA.

Toy troupe de IESVS maintenant affligée,
Courage, tu verras bien tost changer le vent:
Tes Peres sauouroyent leur Croix comme dragée
Et en commun propos les appelloyent souuent.

PANEM NOSTRVM QVOTIDIANVM.

Vous estes leurs enfans: ce n'est pas de merueille,
Si vous estes traictez ainsi qu'ils l'ont esté:
Chasque feste a tousiours en l'Eglise sa veille,
Mais trop tost auez dict à l'Vniuersité.

DA NOBIS.

Ie veux que les meilleurs de ce corps vous honorent
Et tout ce qu'on y voit de plus docte & deuot:
Mais Richer & Fussy & David vous deuorent,
Conseille par aucuns qui sentent le fagot

HODIE.

A ij

*Le croiray-ie ? on le dit, & trouue on estrange
Que les freres en Christ prient à Charenton
Pour l'Vniuersité, & ce depuis Vendange,
O fille de nos Roys, Vas chercheZ du sauon.*

ET DIMITTE.

*Laisse moy ces propos, qui te causent du blasme
Remets toy en credit, incorpore avec toy
Ce grand corps qui l'attend, car l'Huguenot ne trame
Que le perdant te perdre, & puis donner la loy.*

NOBIS.

*Nostre mal est si grand que quelques prescheurs
mesme
Voire quelques Curez font des passionneZ
L'on priera tost pour eux. O creuecœur extresme
Voila Paris, Voila ou nous ont ameneZ.*

DEBITA NOSTRA.

*Et encores sommes nous, nous Docteurs si stupides,
Que nous ne voyons point ces inconueniens :
Nous rions quand on dit, Voila les Parricides
Et nous scauons tres-bien qu'ils en sont innocens.*

SICVT ET NOS.

*On roule, on court, on vole, on rōproit des barrieres
Pour descouvrir l'auteur des fueilles du Bouquet*

7
Messieurs quoy du Tosin, Remonstrance & Beur-
rieres!

Quoy de l'Anticoton? qu'en dit vostre parquet?

DIMITTIMVS.

Dieu vous ouure les yeux vient vn'autre Iustice
Qui ingera la vostre, & point ne tardera,
Je voudrois bien prier Monsieur de S. Sulpice
D'aduertir son fauxbourg qu'en fin tout se payera.

DEBITORIBVS NOSTRIS.

O que de faux Chrestiens! ils quitterent le prosne
Pour aller au Moulin, ou pour ouyr les airs
Qu'entonne le haut bois. Grand Dieu de vostre
Throsne
Dissipez leurs conseils: dans leurs sentiers peruers.

ET NE NOS INDVCAS.

I'ayme les Vieux François: leur croyãce m'est chere
Sainct Louys le bon Roy en estoit enflambé:
Et le feu grand Henry entreroit en cholere,
S'il reuenoit, voyant comme l'on est tombé.

IN TENTATIONEM.

Grande tentation! & d'autant plus à craindre,
Que moins on la cognoist: le perfide Huguenot
Pour certain nous voudroit pouueir vn iour con-
traindre

De chanter avec luy les Pseaumes de Marot.

SED LIBERA NOS.

*Deliure nous, Seigneur, de ce mal formidable,
Deliure nous plustost de ce mortel seiour,
Le mourir nous seroit beaucoup plus desirable,
Que d'estre ainsi trompez, voire mesme vn seul iour.*

A MALO.

*Fais nous donc (Redẽpseur) de ton sang vn Collyre,
Desille nous les yeux pour bien voir le danger,
Où la Tentation du Schisme nous attire,
A fin que la voyant, ayons peur d'y plonger.*

AMEN.

*Qui tient vn langage diuers,
De celuy qui est en ces vers,
Il ne sçait pas ses Patenostres,
N'y le Symbole des Apostres.*